

Bil. 24

Rabu

10 Julai 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KEDUA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Masalah Peralatan-peralatan yang Ketinggalan Zaman bagi
Program Kursus-kursus Ijazah Lanjutan Bidang Perubatan
di Pusat Pengajian Sains Perubatan, Universiti Sains
Malaysia, Kubang Kerian, Kelantan**
- YB. Dr. Azman bin Ismail (*Kuala Kedah*) [Halaman 1]
- **Sistem Transit Aliran Johor-Singapura (RTS)**
- YB. Datuk Seri Ir. Dr. Wee Ka Siong (*Ayer Hitam*) [Halaman 5]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT PERTAMA**

Rabu, 10 Julai 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Masalah Peralatan-peralatan yang Ketinggalan Zaman bagi Program Kursus-kursus Ijazah Lanjutan Bidang Perubatan di Pusat Pengajian Sains Perubatan, Universiti Sains Malaysia, Kubang Kerian, Kelantan.

2.34 ptg.

Dr. Azman bin Ismail [Kuala Kedah]: *Bismillahir Rahmanir Rahim.* Tuan Yang di-Pertua, Pusat Pengajian Sains Perubatan, Universiti Sains Malaysia (PPSP USM) adalah sekolah perubatan yang pertama di Pantai Timur Semenanjung Malaysia. Kampus perubatan ini dibuka pada tahun 1985 dan mengeluarkan barisan doktor sulung pada tahun 1986. Pada tahun 1991, PPSP USM mula menawarkan program ijazah lanjutan di dalam pelbagai bidang perubatan.

Setakat ini seramai 2,236 orang doktor pakar di dalam pelbagai bidang telah dikeluarkan dari PPSP USM dan mereka berkhidmat di seluruh negara. Terdapat 20 kursus kepakaran meliputi bidang perubatan, pembedahan, pediatrik, radiologi, neurosurgeri dan sebagainya sedang dijalankan di PPSP USM. Jumlah pelajar program kepakaran pada masa ini ialah 1,106 orang. Peralatan yang lama dan ketinggalan zaman merupakan masalah yang mengganggu program ijazah lanjutan di PPSP USM pada ketika ini.

Ini adalah kerana teknologi bidang perubatan berkembang dengan sangat pesat dan peralatan yang ketinggalan zaman akan menyebabkan doktor pakar yang dikeluarkan tanpa dilatih dengan teknologi terbaru mungkin tidak dapat memberikan perkhidmatan yang terbaik berbanding dengan pakar yang mendapat pendedahan teknologi terbaru. Antara bidang yang

paling sensitif dengan perkembangan teknologi ini ialah bidang bedah otak dan saraf, jantung, radiologi dan sebagainya.

Pada Januari 2019, PPSP USM mempunyai 9,194 aset peralatan perubatan terbahagi seperti berikut:

- (i) 3,733 aset berusia 0 hingga lima tahun (40 peratus);
- (ii) 1,890 aset berusia 6 hingga 10 tahun (20 peratus);
- (iii) 1,829 aset berusia 11 hingga 14 tahun (20 peratus); dan
- (iv) 1,910 aset berusia 15 tahun dan lebih (20 peratus)

Secara keseluruhannya 50 hingga 60 peratus peralatan-peralatan perubatan PPSP USM sudah berusia sekurang-kurangnya 10 tahun. Di dalam bidang perubatan moden yang serba canggih ini memang ketinggalan zaman yang sangat membimbangkan. Di samping itu, ada peralatan-peralatan yang sudah rosak tetapi masih digunakan di PPSP USM. Ini kerana kos memperbaiki peralatan sangat tinggi, tiada bajet khusus untuk memperbaiki dan menyelenggarakan peralatan sedangkan peralatan sangat diperlukan dalam proses rawatan pesakit dan pembelajaran calon doktor pakar.

Oleh kerana masalah ini menyangkut perkara yang sangat mendasar di dalam latihan doktor-doktor pakar, maka ia boleh menjadi sangat serius jika tidak ditangani dengan baik dan segera. Perlulah ada usaha untuk memastikan bahawa peralatan perubatan yang sesuai dengan perkembangan teknologi semasa ada digunakan di PPSP USM. Perlu juga dipastikan bahawa ada dana yang munasabah untuk tujuan menyelenggarakan dan memperbaiki peralatan-peralatan perubatan di PPSP USM dengan kadar segera sebaik sahaja ada keperluan.

Dengan itu, saya mohon supaya pihak Kementerian Pendidikan memikirkan peruntukan segera buat PPSP USM mengatasi masalah peralatan-peralatan ketinggalan zaman ini dan juga memikirkan satu sistem yang boleh memastikan wujudnya dana penyelenggaraan peralatan-peralatan itu. Terima kasih.

2.38 ptg.

Timbalan Menteri Pendidikan [Puan Teo Nie Ching]: Terima kasih Tuan Yang di-Pertua, terima kasih Ahli Yang Berhormat. Tuan Yang di-Pertua, terlebih dahulu saya ingin merakamkan ucapan penghargaan dan terima kasih kepada Yang Berhormat Kuala kedah di atas keprihatinan Yang Berhormat dalam meningkatkan mutu pembelajaran, pengajaran, penyelidikan dan perkhidmatan di pusat pengajian sains perubatan PPSP USM dan secara tidak langsung sebenarnya melibatkan juga Hospital Universiti Sains Malaysia (HUSM).

Saya mengambil maklum bahawa Yang Berhormat adalah Alumni PPSP USM. Pusat Pengajian Sains Perubatan USM adalah pusat pengajian sains perubatan yang pertama di Pantai Timur Semenanjung Malaysia. PPSP dibuka pada tahun 1979 dan mengeluarkan barisan doktor sulung pada tahun 1986. Pada tahun 1988, PPSP USM mula menawarkan program ijazah lanjutan di dalam pelbagai bidang perubatan. Jumlah *graduate* pakar klinikal yang dikeluarkan adalah seramai 2,655 orang sehingga Mei tahun ini.

PPSP USM menggunakan Hospital USM sebagai pusat latihan. Keseluruhan 330 orang pensyarah perubatan dan pakar yang berada di bawah naungan PPSP USM turut memberikan perkhidmatan klinikal di Hospital USM. Sehingga 3 Julai 2019, PPSP USM menawarkan 21 program kepakaran dengan bilangan pelajar seramai 1,290 orang Ijazah Lanjutan Kepakaran.

■1440

PPSP USM juga merupakan satu-satunya pusat di Malaysia bagi program kepakaran neurosurgery dan plastik surgery. Latihan yang dilaksanakan adalah berfokuskan kepada usaha untuk melahirkan pakar klinikal yang kompeten untuk berkhidmat di pusat yang menyediakan kepakaran asas dan bersedia untuk menjalani latihan lanjut bagi perkhidmatan pusat rujukan sekunder dan tertiar.

Untuk makluman Yang Berhormat, semua universiti awam dan hospital pengajar adalah digalakkan menjana sumber pendapatan sebagai usaha mengurangkan kebergantungan kewangan terhadap kerajaan, selaras dengan hasrat yang dinyatakan dalam Lonjakan Lima, Pelan Pembangunan Pendidikan Malaysia (Pendidikan Tinggi) 2015 hingga 2025 iaitu Kemampanan Kewangan.

Peruntukan kepada sesebuah agensi adalah berdasarkan permohonan yang diterima daripada agensi tersebut. Kelulusan terhadap permohonan tersebut adalah bergantung kepada dua faktor iaitu kedudukan kewangan negara dan tingkat *criticality* berbanding permohonan-permohonan daripada kementerian dan agensi-agensi lain.

Untuk makluman Yang Berhormat, kerajaan telah memperuntukkan geran mengurus kepada semua universiti awam dan hospital pengajar sebanyak RM8,119,206,000 pada tahun 2019. Peruntukan tersebut meliputi emolumen dan perbelanjaan operasi termasuk sewaan, penyelenggaraan dan pembaikan. Justeru, adalah menjadi tanggungjawab pihak universiti dan hospital pengajar untuk memberi keutamaan dalam membelanjakan peruntukan geran yang telah diluluskan.

Untuk makluman Yang Berhormat juga, Hospital USM telah diberikan peruntukan mengurus di bawah objek sebagai (28000) iaitu Penyelenggaraan dan Pembaikan Kecil yang dibeli pada tahun 2018 dan 2019 sebanyak RM24,122,600.

Kerajaan sekali lagi telah meluluskan permohonan peruntukan baharu daripada Hospital USM sebanyak RM18.5 juta bagi Projek Menaik Taraf Infrastruktur Sedia Ada Bagi Perkhidmatan Perawatan Kritikal Hospital USM dengan peruntukan pada tahun 2019 sebanyak RM2 juta. Bagi tahun 2020, KPM telah menerima permohonan peruntukan daripada pihak Hospital USM khusus untuk perolehan peralatan baharu berjumlah RM7.2 juta. Kelulusan terhadap permohonan ini adalah bergantung kepada pertimbangan daripada Kementerian Hal Ehwal Ekonomi dan juga Kementerian Kewangan.

Berhubung kenyataan Yang Berhormat mengenai peruntukan kepada Hospital USM bagi tujuan penyelenggaraan dan pembaikan peralatan, kerajaan memberikan peruntukan tahunan sebanyak RM14 juta hingga RM17 juta setahun. KPM sedang mempertimbangkan cadangan daripada pihak Hospital USM untuk membuat perolehan peralatan yang berkos tinggi dan memerlukan peruntukan yang tinggi untuk penyelenggaraan dan pembaikan supaya dibuat secara sewaan atau sewa beli.

Justeru, dengan rekod peruntukan pembangunan secara purata dari tahun 2006 sehingga 2019 sekitar RM19.4 juta setahun di samping peruntukan mengurus secara purata melebihi RM300 juta setahun. Kerajaan adalah komited dalam membantu Hospital USM menjayakan misi dan visi mereka dalam melahirkan doktor-doktor dan pakar-pakar perubatan, penyelidikan bermutu tinggi dan dalam masa yang sama memberikan perkhidmatan rawatan terbaik kepada pesakit-pesakit. KPM turut mengambil perhatian serius dalam isu ini dan akan membantu PPSP USM untuk membuat perolehan peralatan perubatan secara berperingkat. KPM menyedari kos penyelenggaraan bagi aset yang telah usang adalah tinggi.

Sehubungan dengan itu, KPM mencadangkan perolehan aset baharu dilaksanakan melalui empat kaedah iaitu melalui pembelian, sewaan, tanggungjawab sosial korporat (CSR) dan sedang mempertimbangkan mekanisme wakaf dalam pembelian peralatan. Hospital USM telah membuat perancangan dan perolehan aset secara sewaan melalui bajet mengurus iaitu perolehan secara sewaan sebanyak tujuh buah aset sedia ada yang bernilai RM7 juta setahun.

Sukacita dimaklumkan bahawa KPM telah meluluskan bajet bagi perolehan secara sewaan sebanyak RM13.9 juta bagi tempoh lima tahun dengan kos sewaan RM2.78 juta setahun bagi peralatan angiogram dan dijangka beroperasi mulai bulan Disember tahun ini. KPM juga sedang mempertimbangkan keperluan bajet bagi tujuan penyelenggaraan aset secara berkala dan di luar jangka untuk aset bernilai tinggi dan kritikal seperti *CT scan*, *gamma camera*, *invasive cardiac lab* (ICL) dan *magnetic encephalogram* (MEG) serta permohonan untuk perolehan terus dan sewaan aset yang membawa kepada implikasi kewangan sebanyak RM10.4 juta melibatkan 165 aset bagi tahun 2020.

KPM amat menghargai dan mengalu-alukan sebarang cadangan bernas oleh Yang Berhormat demi penambahbaikan kualiti latihan dan penyelidikan perubatan di PPSP USM. Sekian, jawapan saya. Terima kasih.

Sistem Transit Aliran Johor - Singapura (RTS)

2.46 ptg.

Datuk Seri Ir. Dr. Wee Ka Siong [Ayer Hitam]: Terima kasih Tuan Yang di-Pertua. Projek Sistem Transit Aliran Johor dan Singapura (RTS) berupaya memberi manfaat kepada hampir 288,000 pengguna yang berulang-alik antara Malaysia dan Singapura. Ianya mod pengangkutan yang paling cepat, murah dan dinanti-nantikan orang ramai khususnya penduduk Johor.

Terdahulu timbul isu berkaitan pemilikan tanah. Namun ia telah pun selesai dan tiada lagi sebab untuk tidak memulakan projek berkenaan. Menteri Pengangkutan Singapura, Khaw Boon Wan pernah melahirkan rasa kecewa pihaknya apabila projek ini tidak berjalan lancar dan lewat daripada jadual asal. Perjanjian Dua Hala RTS Link (BA) yang dimeterai Singapura dan Malaysia pada Januari 2018, telah menetapkan syarikat usaha sama (JVC) membabitkan SMRT dan Prasarana ditubuhkan 30 Jun 2018.

Manakala JVC itu perlu dilantik sebagai operator atau pengendali RTS Link (OpCo) menerusi satu Perjanjian Konsesi (CA) dengan Pihak Berkuasa Pengangkutan Darat (LTA) Singapura dan Kerajaan Malaysia menjelang 30 September 2018. Baru-baru ini, ada perkhabaran bahawa kerajaan baharu berhasrat untuk menyerahkan pengoperasian RTS kepada pihak swasta. Apakah justifikasi untuk Kerajaan Malaysia menyerahkan kepada pihak swasta? Apa pula kebaikannya? Apakah kesan tindakan ini kepada CA yang ditandatangani dengan Singapura?

Justeru itu, saya menggesa pihak kementerian:

- (i) memberikan penjelasan secara holistik mengenai sebab-sebab kelewatan pembinaan RTS;
- (ii) langkah-langkah yang diambil bagi merealisasikan projek infra rakyat ini; dan
- (iii) menggesa kementerian segera mengatasi segala kekangan demi keperluan rakyat dan negara khususnya di negeri Johor.

Sekian, terima kasih.

2.49 ptg.

Timbalan Menteri Pengangkutan [Dato' Kamarudin Jaffar]: Terima kasih. *Assalamualaikum warahmatullahi wabarakatuh.* Tuan Yang di-Pertua dan khususnya sahabat saya Yang Berhormat Ayer Hitam. Untuk makluman Yang Berhormat, perjanjian dua hala bagi pelaksanaan Projek Rapid Transit Link (RTS Link) antara Johor Bahru dan Singapura telah ditandatangani oleh Kerajaan Malaysia pada 16 Januari 2018. Selepas kerajaan baharu mengambil alih pentadbiran kerajaan, kerajaan telah mengkaji semula terma perjanjian termasuk skop kerja, kos projek, serta kaedah pembiayaan yang telah diputuskan oleh kerajaan terdahulu.

Daripada hasil kajian tersebut, kerajaan mendapati perjanjian yang telah ditandatangani oleh kerajaan terdahulu tidak memberi manfaat jangka panjang kepada Malaysia.

■1450

Kerajaan berpandangan perancangan projek ini termasuk dari segi pemilihan teknologi, penetapan spesifikasi sistem kereta api seperti stok kereta dan sistem semboyan struktur serta kos pelaksanaan projek ini perlu dikaji dan dirunding semula agar ianya boleh memberi manfaat kepada kedua-dua buah negara dengan kos yang lebih rendah di samping dapat mencapai matlamat untuk mengurangkan kesesakan di Tambak Johor.

Selain itu, perancangan penyelesaian bagi kesesakan antara Johor Bahru - Singapura juga perlu mengambil kira perancangan sistem pengangkutan awam yang cekap di negeri Johor. Bagi membolehkan rundingan tersebut dijalankan secara objektif oleh kedua-dua buah negara, Kerajaan Malaysia dan Singapura telah menandatangani perjanjian tambahan pada 21 Mei 2019 untuk menangguhkan pelaksanaan projek RTS Link ini selama enam bulan iaitu mulai 1 April 2019 sehingga 30 September 2019.

Tuan Yang di-Pertua dan Ahli-ahli Yang Berhormat, bagi mempercepatkan penyelesaian yang diperlukan oleh kedua-dua negara, kerajaan telah mengarahkan kementerian ini mengkaji opsyen-opsyen dan penambahbaikan yang boleh dilaksanakan untuk mengurangkan kos projek namun masih dapat mencapai matlamat mewujudkan sistem pengangkutan awam yang cekap di antara kedua-dua buah negara.

Buat masa ini, kerajaan masih belum memutuskan sama ada pelaksanaan projek ini akan diteruskan oleh Prasarana atau mana-mana syarikat yang ingin bekerjasama dengan kerajaan untuk mengurangkan beban kewangan kerajaan. Rundingan aktif juga sedang dijalankan antara Malaysia dengan Singapura dan dijangka satu penyelesaian yang boleh memanfaatkan kedua-dua buah negara akan dikenal pasti dalam masa terdekat. Sekian, terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 11 Julai 2019.

[Kamar Khas ditangguhkan pada pukul 2.52 petang]